

Bouônjour, ch'est Ken Vibert de Grosnez tchi vos présente la Lettre Jèrriaise aniet lé 6 d'Mar 2021.

Au mais d'Mai l'année pâssée j'èrchus un coup d'téléphone d'un anmîn qui, comme mé, est r'tithé. I'm dit q'eune parchonniéthe de ses jours comme maître d'êcole, Anne Martin, li avait d'mandé si par chance i' m'connaissait. Ou li avait dit qu'ou 'tait seûthe qu'ou' 'tait ma couôsinne et qu'oulle avait envie d'faïthe contact aue mé. Auprés qu'j'li avais envié un e-mail pour m'introduithe, ou'm téléphonit et m'dit qu'oulle avait 'té à chèrfouoilli dans l's' affaithes qué sa méthe avait laïssi dans l'galetas quand oulle avait mouothi, et qu'oulle avait trouvé eune lettre d'une femme en Espangne tchi s'app'lait Fran.

Dans chutte lettre oulle avait écrit les détails d'eune visite tch'oulle avait fait à la fèrme dé Grosnez en mille neuf chents septante. Ou disait qu'oulle avait rencontré sa couôsinne Lydie Florence Vibert née Le Feuvre et Ken Vibert et sa femme Beryl. I' lyi avaient montré lé portrait du Cap'taine Édouard Le Feuvre tchi 'tait pendu dans la bouonne tchuîsinne à Lydie et s'n' homme Edwin, I' lyi avaient dit qué l' portrait avait 'té peint en Italie duthant iun d' ses viages en mé, quand i' 'tait maître d'un navithe. I' lyi avaient étout montré la baromette et la longue-veue au vièr Cap'taine. Chutte femme d'Espangne disait dans sa lettre que chu Cap'taine Le Feuvre 'tait l' bieu péthe à sa tante Lidia tch'avait mathié Douard Le Feuvre dé Grosnez, et i' d'vait être des pathents.

Duthant les temps qu'j'aviomme 'té enfreumés Anne avait fait des r'chèrches à l'ordinnateu et avait trouvé un site où'est qu' touos les viages qué l' vièr Cap'taine Le Feuvre avait fait, 'tait listé. A ch't heu ou voulait en saver pus long. Lé Cap'taine, 'tait-i' m'n' anchêtre, car ou 'tait seûthe qu'i' 'tait l' grand-péthe à sa méthe. Ou m'explyitchit qu' sa grand-méthe 'tait eune Le Brocq dé St Ouen tch'avait mathié

John Le Feuvre lé fis au vièr Cap'taine Le Feuvre, et viyant qu'appathenment lé portrait du bouônhomme avait 'té pendu dans la bouonne tchuîsinne à Grosnez, jé d'viêmes probabliément être couôskins. J'lyi dit qu' ou' 'tait tout à fait correcte, et qu' j'avais connu ses grand-pathents quand j'tais mousse et qu'j'allais en ville auve ma grand-méthe au Sanmedi. Ou visite tréjous s'n' oncl'ye John et sa tante Emma pour lus em'ner d's oeufs.

Étout j'connaïssais l' bouônhomme John quand j'allais auve man p'pée porter les patates sus l'bridge. L'oncl'ye John acatait pour la compagnie "Bird et Le Montee" tch'était dans La Parade, et quand i'n'y'avait pas grand d'mande pour les patates il' acataient tréjous les notres. L'oncl'ye John 'tait l'deuxième fis au Cap'taine auprès man grand grand péthe 'Douard. Les deux fréthes avaient mathié les deux soeurs Le Brocq d' la Fosse au Bouais.

Ch'est drôle comment que bein des famil'yes perdent contact si vite. Lé Cap'taine Le Feuvre tchi mathyit Mary Anne Vautier et tch' eût 12 êfants lus trouvitent avec seulement qu' eune pouongnie de p'tits êfants et qu' ches-là se sont pèrdus d'veue toute d'suite. A' ch't'eu qu' y'a bein pus d' èrchèrche dé faite, les famil'yes ons bein pus d' chance de s'èrtrouver. Quand touos ches règles et restrictions s'en vont êt' finies, j'men vais pouver mé réuni auve Anne Martin, et nos deux partie d'la famil'yes pouôrront lus r'etabli dé nouvè.

Et bein mèrcie dé m'aver êcouté à matîn.